

0.0.1 akkhaṇasuttaṃ

0. sāvattthinidānaṃ

1. khaṇakicco loko khaṇakicco lokoti bhikkhave, asutavā puthujjano bhāsatī no ca kho so jānāti khaṇaṃ vā akkhaṇaṃ vā. aṭṭhime bhikkhave, akkhaṇā asamāyā brahmacariyavāsāya. katame aṭṭha.

2. idha bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatapavedito, ayañca puggalo nirayaṃ upapanno hoti. ayaṃ bhikkhave, paṭhamo akkhaṇo asamāyā brahmacariyavāsāya.

3. puna ca paraṃ bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito, ayañca puggalo tiracchānayaṇiṃ upapanno hoti. ayaṃ bhikkhave, dutiyo akkhaṇo asamāyā brahmacariyavāsāya.

4. puna ca paraṃ bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito, ayaṅca puggalo pettivisayaṃ uppanno hoti. ayaṃ bhikkhave, tatiyo akkhaṇo asamayo brahmacariyavāsāya.

5. puna ca paraṃ bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito, ayaṅca puggalo aññataraṃ dīghāyukaṃ devanikāyaṃ upapanno hoti. ayaṃ bhikkhave catuttho akkhaṇo asamayo brahmacariyavāsāya.

6. puna ca paraṃ bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito, ayaṅca puggalo paccantimesu janapadesu paccājāto hoti aviññātāresu milakkhesu. yatha natthi gati bhikkhūnaṃ bhikkhunīnaṃ upāsakānaṃ upāsikānaṃ. ayaṃ bhikkhave pañcamo akkhaṇo asamayo brahmacariyavāsāya.

7. puna ca paraṃ bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito, ayañca puggalo majjhimesu janapadesu paccājāto hoti micchādiṭṭhiko viparītadassano natthi dinnaṃ natthi yiṭṭhaṃ natthi hutam natthi sukaṭa-dukkatānaṃ kammānaṃ phalaṃ vipāko, natthi ayaṃ loko natthi paro loko natthi mātā natthi pitā natthi sattā opapātikā natthi loke samaṇabrāhmaṇā sammaggaṭā sammāpaṭipannā ye imañca lokaṃ parañca lokaṃ sayam abhiññā sacchikatvā pavedentīti. ayaṃ bhikkhave chaṭṭho akkhaṇo asamayo brahmacariyavāsāya.

8. puna ca paraṃ bhikkhave, tathāgato ca loke uppanno hoti araham sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito, ayañca puggalo majjhimesu janapadesu paccājāto hoti so ca hoti duppañño jaḷo elamūgo. na paṭibalo subhāsita dubbhāsitassa atthamaññātum. ayaṃ bhikkhave sattamo akkhaṇo asamayo brahmacariyavāsāya.

9. puna ca paraṃ bhikkhave, tathāgato ca loke uppanno hoti arahaṃ sammā sambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca na desīyati opasamiko parinibbāyiko sambodhagāmī sugatappavedito, ayañca puggalo majjhimesu janapadesu paccājāto hoti so ca hoti paññavā ajaḷo anela-mūgo paṭibalo subhāsita dubbhāsitassa atthamaññātum. ayaṃ bhikkhave, aṭṭhamo akkhaṇo asamayo brahmacariyavāsāya. ime kho bhikkhave, aṭṭha akkhaṇā asamayā brahmacariyavāsāya.

10. ekova bhikkhave, khaṇo ca samayo ca brahmacariyavāsāya. katamo eko: idha bhikkhave, tathāgato ca loke uppanno hoti, arahaṃ sammāsambuddho vijjācaraṇasampanno sugato lokavidū anuttaro purisadammasārathī satthā devamanussānaṃ buddho bhagavā. dhammo ca desīyati opasamiko parinibbāyiko sambodhagāmī sugatappavedito. ayañca puggalo majjhimesu janapadesu paccājāto hoti. so ca hoti paññavā ajaḷo anela-mūgo paṭibalo subhāsita dubbhāsitassa atthamaññātum. ayaṃ bhikkhave, ekova khaṇo ca samayo ca brahmacariyavāsāyāti.

manussalābhaṃ laddhāna,
saddhamme suppavedite;
ye khaṇaṃ nādhigacchanti,
atināmenti te khaṇaṃ.

bahū hi akkhaṇā vuttā,
 maggassa antarāyikā;
 kadāci karahaci loke,
 uppajjanti tathāgatā.

tassidaṃ sammūkhībhūtaṃ,
 yaṃ lokasmiṃ sudullabhaṃ;
 manussapaṭilābho ca,
 saddhammassa ca desanā;
 alaṃ vāyamituṃ tattha,
 attakāmena jantunā.

kathaṃ vijaññā saddhammaṃ,
 khaṇo ve mā upaccagā;
 khaṇātītā hi socanti,
 nirayamhi samappitā.

idha ceva naṃ virādheti,
 saddhammassa niyāmatam;
 vāṇijova atītatto,
 cirattaṃ anutapessati.

avijjānivuto poso,
 saddhammaṃ aparādhiko;
 jātimaṇasasāraṃ,
 ciraṃ paccañubhossati.

ye ca laddhā manussattaṃ,
 saddhamme suppavedite;
 akaṃsu tattha vacanaṃ,

karissanti karonti vā.

khaṇaṃ paccaviduṃ loke,
brahmacariyaṃ anuttaraṃ;
ye maggaṃ paṭipajjimsu,
tathāgatappaveditaṃ.

ye saṃvarā cakkhumatā,
desitādiccabandhunā;
tesu gutto sadā sato,
vihare anavassuto.

sabbe anusaye chetvā,
māradheyya sarānuge;
te ve pārāgatā loke,
ye pattā āsavakkhayanti.